



**TAJUK KHUTBAH JUMAAT**

**Siri: 51/2023**

**TAKABBUR MELENYAPKAN KEHARMONIAN**

**22 Disember 2023**

*Bersamaan*

**9 Jamadilakhir 1445**

**DIKELUARKAN OLEH:**

**JABATAN HAL EHWAL AGAMA  
TERENGGANU**

**PERINGATAN:**

Adalah diingatkan bahawa sebarang penambahan dan pemindaan terhadap isi kandungan teks khutbah yang telah disediakan oleh Jabatan Hal Ehwal Agama Terengganu adalah **DILARANG**.

Khatib yang bertugas hendaklah menyemak kembali **RUKUN, AYAT AL-QURAN** dan helaian muka surat yang diterima. Pastikan teks dibaca terlebih dahulu sebelum menyampaikan khutbah.

## KHUTBAH PERTAMA

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ،  
وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ أَعْمَالِنَا،  
مَنْ يَهْدِ اللَّهُ فَلَا مُضِلَّ لَهُ، وَمَنْ يَضِلَّ فَلَا هَادِيَ لَهُ،  
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.  
اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ،  
وَمَنْ سَارَ عَلَى نَهْجِهِ، وَتَمَسَّكَ بِسُنَّتِهِ، وَاقْتَدَى بِهَدْيِهِ،  
وَاتَّبَعَهُمْ بِإِحْسَانٍ إِلَى يَوْمِ الدِّينِ.  
أَمَّا بَعْدُ، فَيَا أَيُّهَا الَّذِينَ آمَنُوا اتَّقُوا اللَّهَ حَقَّ تُقَاتِهِ،  
وَلَا تَمُوتُنَّ إِلَّا وَأَنْتُمْ مُسْلِمُونَ.

Saya berpesan kepada diri saya dan juga para jemaah sekalian agar kita benar-benar bertakwa kepada Allah SWT dengan menjunjung segala perintah-Nya dan menjauhi segala larangan-Nya. Lazimkan diri dalam ketaatan, mudah-mudahan kita dimatikan Allah dalam keadaan patuh tunduk kepada-Nya.

Khutbah pada hari yang mulia ini bertajuk:

**"TAKABBUR MELENYAPKAN KEHARMONIAN".**

## Sidang Jumaat yang dikasihi Allah,

Di antara faktor yang boleh melemah, malah melenyapkan keharmonian masyarakat ialah sikap sombong, takabbur, angkuh atau meninggi diri. Takabbur adalah di antara sifat negatif dan keji yang telah mendapat celaan berat daripada Allah dan Rasul-Nya. Inilah sifat keji yang terawal di kalangan makhluk yang bernama Iblis yang enggan patuh kepada perintah Allah supaya sujud kepada Nabi Adam AS. Firman Allah dalam surah al-Baqarah ayat 34:

وَإِذْ قُلْنَا لِلْمَلَائِكَةِ اسْجُدُوا لِآدَمَ فَسَجَدُوا إِلَّا إِبْلِيسَ أَبَىٰ وَاسْتَكْبَرَ وَكَانَ

مِنَ الْكَافِرِينَ ﴿٣٤﴾

**Maksudnya:** “Dan ketika Kami berfirman kepada malaikat: Tunduklah kepada Nabi Adam. Lalu mereka sekaliannya tunduk memberi hormat kecuali Iblis; ia enggan dan takbur, dan menjadilah ia dari golongan yang kafir.”

Sikap takabbur iblis itu telah membawa kepada padah yang dahsyat di mana ia dihalau, direjam, dilaknat atau dijauhi daripada rahmat Allah. Firman Allah dalam surah Sad ayat 77 dan 78:

قَالَ فَأَخْرِجْ مِنْهَا فَإِنَّكَ رَٰجِمٌ ﴿٧٧﴾ وَإِنَّ عَلَيْكَ لَعْنَتِي إِلَىٰ يَوْمِ الدِّينِ ﴿٧٨﴾

**Maksudnya:** “Allah berfirman: Kalau demikian, keluarlah engkau daripada syurga, kerana sesungguhnya engkau adalah makhluk yang diusir. Dan sesungguhnya engkau ditimpa laknat-Ku terus menerus hingga ke hari kiamat!”

Amaran keras juga diberikan oleh Rasulullah SAW dengan sabdanya:

لَا يَدْخُلُ الْجَنَّةَ مَنْ كَانَ فِي قَلْبِهِ مِثْقَالُ ذَرَّةٍ مِنْ كِبَرٍ

**Maksudnya:** *“Tidak akan masuk Syurga sesiapa yang ada dalam hatinya perasaan takabbur walaupun seberat zarah”.*

(Hadis riwayat Muslim)

**Sidang Jumaat yang dirahmati Allah,**

Dari segi istilah, takabbur ialah; keistimewaan yang dirasakan oleh seseorang pada dirinya, membuatkan ia mengkagumi diri dan merasa lebih daripada orang lain. Maksud takabbur yang paling tepat ialah sebagaimana yang dijelaskan oleh Nabi SAW dengan sabdanya:

الْكِبْرُ بَطْرُ الْحَقِّ وَغَمَطُ النَّاسِ

**Maksudnya:** *“Takabbur itu menolak kebenaran dan memandang rendah kepada orang lain.”*

(Hadis riwayat Muslim)

Dalam ertikata lain, takabbur ialah keegoan pada diri, kedudukan dan pandangan sendiri, yang menyebabkan seseorang itu sukar menerima kenyataan, apatah lagi jika ia dirasa merugikan dan merendahkan martabatnya.

Lihatlah Iblis, oleh kerana ego dengan asal kejadiannya dan memandang rendah kepada Nabi Adam a.s, ia sanggup menentang kebenaran yang datang daripada Allah dan rela disingkir. Seterusnya, lantaran hasad dan dendamnya, Iblis bersumpah untuk memusuhi Adam a.s dan zuriatnya. Takabbur Iblis inilah yang menggugat keharmonian dan kebahagiaan Adam dan isterinya Hawa.

Demikianlah, jika kita terperangkap dengan tipu muslihat Iblis dan memiliki sifat kejinya ini, maka keharmonian dan kesejahteraan hidup kita akan berkecai.

## **Saudara sidang Jumaat yang dimuliakan Allah,**

Untuk menghindari takabbur, kita perlu menangani faktor-faktornya dan berusaha menjauhinya. Para ulama' telah menghuraikan sebab-sebab kepada takabbur, antaranya ialah:

**Pertama:** Tidak sudi tunduk kepada orang lain kerana merasa diri lebih.

**Kedua:** Tidak mahu menyerlahkan kekurangan diri, sikap dan akhlak negatifnya.

**Ketiga:** Sanjungan berlebihan yang diperolehi.

**Keempat:** Penilaian yang tidak tepat tentang kelebihan. Contohnya; percaya kelebihan ada pada pangkat atau harta.

**Kelima:** Mengagumi kelebihan diri sendiri, seperti kelebihan ilmu, amal ibadat, harta, kekuatan, para pengikut yang ramai dan sebagainya, serta lupa kepada Pengurniannya iaitu Allah SWT.

## **Sidang Jumaat yang dikasihi,**

Kesemua faktor atau sebab takabbur tadi, jika dibiarkan membarah, ia akan melemahkan, malahan menghapuskan keharmonian, kesejahteraan dan perpaduan ummah.

Justeru, marilah kita menjauhi sifat sombong dan takabbur dengan:

**Pertama:** Menginsafi bahaya dan akibat buruk sifat takabbur, seperti dimurkai dan dilaknat oleh Allah, dibenci orang, kekal dalam kesalahan, gagal memperbaiki diri dan sebagainya lagi.

**Kedua:** Mengenali siapa diri, membina Ma'rifatu Allah, sentiasa bersyukur dan mengembalikan sanjungan kepada limpah kurnia Allah..

**Ketiga:** Memahami dan merawat dengan baik faktor-faktor yang boleh mendorong rasa takabbur.

**Keempat:** Sentiasa tawadhu' iaitu merendah diri di samping mendidik diri belas kasih kepada orang lain, termasuk mereka yang tidak bernasib baik, lemah dan kekurangan dalam ilmu, harta, kedudukan dan sebagainya.

**Kelima:** Sedia mendengar, menghormati seterusnya menerima pandangan, idea, teguran dan lain-lain yang benar lagi syar'ie, tanpa mengira sumbernya.

**Keenam:** Sering berdoa dan memohon pertolongan Allah supaya dihindari sifat takabbur dan menyombong diri.

### **Sidang Jumaat sekalian,**

Mengakhiri khutbah ini, marilah kita merenungi akan hakikat kejadian diri kita yang serba kekurangan dan lemah. Insafilah tentang kedudukan diri kita sebagai hamba Allah SWT. Oleh itu, hiaskan diri dengan sifat tawadhu', sama ada di hadapan-Nya, mahupun sesama para hamba-Nya.

Ingatlah, jika Allah mengurniakan kelebihan atau keistimewaan kepada kita, maka pergunakanlah ianya bagi membantu dan menolong mereka yang memerlukan. Perbanyakkan syukur kepada Allah SWT atas kurniaan-Nya tersebut.

أَعُوذُ بِاللَّهِ مِنَ الشَّيْطَانِ الرَّجِيمِ

وَلَا تَمْشِ فِي الْأَرْضِ مَرَحًا إِنَّكَ لَن تَخْرِقَ الْأَرْضَ وَلَن تَبْلُغَ الْجِبَالَ طُولًا ﴿٣٧﴾

كُلُّ ذَلِكَ كَانَ سَيِّئُهُ عِنْدَ رَبِّكَ مَكْرُوهًا ﴿٣٨﴾

**Maksudnya:** “Janganlah kamu berjalan di bumi ini dengan sombong, sesungguhnya kamu tidak akan dapat menembusi bumi, dan tidak akan sampai setinggi gunung. Tiap-tiap satu perintah itu, menyalahinya adalah kejahatan yang dibenci di sisi Tuhanmu.

(Surah al-Isra' : 37-38)

بَارَكَ اللَّهُ لِي وَلَكُمْ بِالْقُرْآنِ الْعَظِيمِ،  
وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ،  
وَتَقَبَّلَ اللَّهُ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ،  
أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ،  
وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ،  
فَاسْتَغْفِرُوهُ، إِنَّهُ هُوَ الْغَفُورُ الرَّحِيمُ.

## **KHUTBAH KEDUA**

الْحَمْدُ لِلَّهِ رَبِّ الْعَالَمِينَ. وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،  
وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.  
اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ، وَعَلَى آلِهِ وَأَصْحَابِهِ أَجْمَعِينَ.  
أَمَّا بَعْدُ، فَيَا عِبَادَ اللَّهِ! اتَّقُوا اللَّهَ فَقَدْ فَازَ الْمُتَّقُونَ.

**Muslimin sidang Jumaat yang dirahmati Allah,**

Khatib menyeru kepada sidang jumaat sekalian, marilah sama-sama kita imarahkan masjid ini dengan menunaikan solat berjemaah. Sesungguhnya solat berjemaah mempunyai banyak fadhilat dan hikmahnya.

Justeru, janganlah tuan-tuan menanggung-nanggungkan untuk datang ke masjid. Bawalah anak-anak kita, ajaklah jiran tetangga dan ahli qaryah kita untuk sama-sama mengimarahkan masjid ini. Mudah-mudahan usaha kita ini mendapat rahmat, keampunan dan keredhaan daripada Allah di dunia dan akhirat.

Khatib juga ingin menegaskan bahawa di dalam harta kita terdapat hak orang lain yang perlu kita tunaikan. Justeru, salurkanlah zakat dan wakaf anda melalui Majlis Agama Islam dan Adat Melayu Terengganu (MAIDAM) selaku badan yang dipertanggungjawabkan untuk menguruskan zakat dan wakaf di Negeri Terengganu. Pihak majlis juga memerlukan kerjasama semua pihak untuk menyalurkan maklumat golongan yang memerlukan sekiranya diketahui, agar mereka yang kurang bernasib baik akan mendapat pembelaan sewajarnya.

**Sidang jumaat sekalian,**

Marilah juga kita memperbanyakkan ucapan selawat dan salam kepada Rasulullah SAW sebagaimana firman Allah dalam surah al-Ahzab ayat 56:



إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾

اللَّهُمَّ صَلِّ عَلَى سَيِّدِنَا مُحَمَّدٍ، وَعَلَى آلِ سَيِّدِنَا مُحَمَّدٍ، كَمَا صَلَّيْتَ عَلَى سَيِّدِنَا  
إِبْرَاهِيمَ، وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا مُحَمَّدٍ، وَعَلَى آلِ سَيِّدِنَا  
مُحَمَّدٍ، كَمَا بَارَكْتَ عَلَى سَيِّدِنَا إِبْرَاهِيمَ، وَعَلَى آلِ سَيِّدِنَا إِبْرَاهِيمَ فِي الْعَالَمِينَ،  
إِنَّكَ حَمِيدٌ مُجِيدٌ.

اللَّهُمَّ اغْفِرْ لِلْمُؤْمِنِينَ وَالْمُؤْمِنَاتِ، وَالْمُسْلِمِينَ وَالْمُسْلِمَاتِ، الْأَحْيَاءِ مِنْهُمْ  
وَالْأَمْوَاتِ، إِنَّكَ سَمِيعٌ قَرِيبٌ مُجِيبُ الدَّعَوَاتِ.

اللَّهُمَّ اذْفَعْ عَنَّا الْبَلَاءَ وَالْوَبَاءَ وَالْفَحْشَاءَ مَا لَا يَصْرِفُهُ غَيْرُكَ.

اللَّهُمَّ إِنَّا نَعُوذُ بِكَ مِنَ الْبَرَصِ وَالْجُنُونِ وَالْجُدَامِ وَمِنَ السَّيِّئِ الْأَسْقَامِ. اللَّهُمَّ اشْفِ  
مَرْضَانَا وَارْحَمْ مَوْتَانَا، وَالطِّفْ بِنَا فِيمَا نَزَلَ بِنَا.

اللَّهُمَّ احْفَظْ مَوْلَانَا الْوَاتِقَ بِاللَّهِ السُّلْطَانَ مِيزَانَ زَيْنِ الْعَابِدِينَ، ابْنَ الْمَرْحُومِ  
السُّلْطَانِ مُحَمَّدِ الْمُكْتَفِيِّ بِاللَّهِ شَاهٍ، وَأَنْزِلِ الرَّحْمَةَ عَلَيْهِ وَعَلَى السُّلْطَانَةِ نُورِ  
زَاهِرَةِ، سُلْطَانَةِ تَرَغْكَانُو.

وَاحْفَظْ أَوْلَادَهُ وَأَهْلَهُ وَرِعَايَاهُ مِنَ الْمُسْلِمِينَ وَالْمُسْلِمَاتِ فِي الدُّنْيَا وَالْآخِرَةِ،  
بِرَحْمَتِكَ يَا أَرْحَمَ الرَّاحِمِينَ.

اللَّهُمَّ احْفَظْ وَلِيَّ الْعَهْدِ تَعَكُّو مُحَمَّدَ إِسْمَاعِيلَ ابْنَ الْوَائِقِ بِاللَّهِ السُّلْطَانَ مِيزَانَ  
زَيْنِ الْعَابِدِينَ.

اللَّهُمَّ أَعِزِّ الْإِسْلَامَ وَالْمُسْلِمِينَ، وَأَذِلِّ الْمُعْتَدِينَ الظَّالِمِينَ، وَدَمِّرْ أَعْدَائِكَ أَعْدَاءَ  
الدِّينِ، وَانصُرْنَا عَلَيْهِمْ يَا رَبَّ الْعَالَمِينَ. اللَّهُمَّ انصُرْ إِخْوَانَنَا الْمُسْلِمِينَ  
وَالْمُجَاهِدِينَ فِي فَلَسْطِينَ وَفِي كُلِّ مَكَانٍ.

**Ya Allah,**

Kurniakanlah ganjaran pahala yang berterusan kepada pembayar- pembayar zakat yang telah menunaikan zakat melalui Majlis Agama Islam dan Adat Melayu Terengganu (MAIDAM) serta berkatilah dan rahmatilah segala harta- harta mereka yang berbaki. Kami memohon kepada-Mu agar harta- harta kami menjadi harta-harta yang bersih dan jadikanlah zakat kami ini sebagai saham buat kami di akhirat kelak.

**Ya Allah**

Jadikanlah negeri ini negeri yang aman, maju lagi diberkati. Bukakanlah pintu- pintu rezeki dari segala penjuru. Kurniakanlah kepada kami nikmat kesejahteraan yang berterusan. Jauhkanlah negeri kami ini daripada segala malapetaka, musibah dan apa jua kemurkaan-Mu.

**Ya Allah,**

Anugerahkan pertolongan dan bantuanMu untuk saudara kami di Palestin. Berikanlah ketabahan dan kekuatan kepada saudara kami di sana dalam menghadapi kekejaman rejim zionis. Peliharakanlah bumi Baitul Maqdis dan seluruh saudara kami di sana.

آمين يا الله، يا رب العالمين

رَبَّنَا آتِنَا فِي الدُّنْيَا حَسَنَةً وَفِي الآخِرَةِ حَسَنَةً وَقِنَا عَذَابَ النَّارِ.  
وَصَلَّى اللهُ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلَّمَ.  
وَالْحَمْدُ لِلَّهِ رَبِّ الْعَالَمِينَ.

عِبَادَ اللهِ!

إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايِ ذِي الْقُرْبَىٰ وَيَنْهَىٰ عَنِ الْفَحْشَاءِ  
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ  
فَاذْكُرُوا اللَّهَ الْعَظِيمَ يَذُكُرْكُمْ، وَاشْكُرُوا لَهُ عَلَىٰ نِعْمِهِ يَزِدْكُمْ،  
وَلَذِكُرِ اللَّهُ أَكْبَرُ، وَاللَّهُ يَعْلَمُ مَا تَصْنَعُونَ.  
قُومُوا إِلَىٰ صَلَاتِكُمْ، يَرْحَمُكُمُ اللَّهُ.

